

平定粵匪紀略

平定粵匪紀略卷三

咸豐四年甲寅正月北軍攻克獨流賊巢

三年十一月我兵小挫勝大臣與僧王合兵建以圍
爲攻之策屢獲成效所陷各城以次收復惟獨流窮
賊固壘抗拒奉

嚴旨飭催以期速清畿甸於是臨陣之將親冒矢石鼓勇
之卒不避死亡於四年正月初八日大破獨流賊巢
餘匪由靜海紛竄占踞束城陳官桃園社九等邨莊
僧王勝大臣督各軍追擊之

湖北軍覆於黃州總督吳文鎔死之

湖北賊聚於黃州張署總督亮基調撫山東吳總督
文鎔抵任奉

旨出省督師於三年十二月赴黃州駐堵城距郡二十里
是年正月初十日諜知逆黨大張鎧火飲酒觀劇不
設防吳總督以爲有懈可擊親督兵勇進勦三戰斃
賊數百名連日大雪諸軍凍餒有死者逆黨繞道出
大營後林麓岡巒設伏幾徧十五日全股悍賊自黃
城驟至連營火起兵勇大潰吳總督殉難二品頂戴

臬司唐樹義督率水勇礮船退赴金口收集潰卒圖再舉而逆黨尾追陷漢陽直上沿江皆逆艇旂幟疊次襲擊竝沈賊船十餘隻因賊眾蟻集坐船爲其擊沈唐臬司落木身死有家丁王貴懷其邱竄伏鄰近乞食設法出溺骸官爲殯殮貴因傷重旋死

二月揚州軍追勦瓜州賊總兵瞿騰龍陣亡

總兵瞿騰龍帶兵由瓜州西岸進勦屢報克捷賊傾巢出鬪初五日官兵兩岸魚貫進左翼德興阿右翼鞠殿華縱兵衝突賊紛潰殲斃三百餘名騰龍下馬

步行持刀殺賊數十名以深入遇害

逆匪分股陷安徽太平府前學政孫銘恩殉難

金陵逆遣僞將軍孫寅三等由太平後路竄祁門縣復繞而南是月陷太平府學政孫銘恩已因請終養獲咎未受代自經以殉賊遂踞爲老巢結壘三十餘座直達江干與金陵往來不絕

僧王克復三邨賊退入阜城縣

逆匪自東城等處竄踞阜城縣分占附近各邨莊二月十五日僧王相度地勢派副都統郭什訥達洪阿

副將史榮椿侍衛達崇阿等分攻堆邨連邨林家場
三處用草束火藥燃燒房屋冒火撲入躍牆登屋愈
殺愈進統計斬殺僞指揮監軍總制師帥旅帥卒長
兩司馬等一百餘名逆眾三千餘名擒獲老賊三百
餘名斬首四百餘級燒斃及自盡者不計其數逆匪
潰敗入城

岳州復陷官兵擊賊湘陰

楊逆遣石祥貞曾漢黃各賊舍武昌而溯江直上二
月初一日陷岳州分擾靖江橋口等處竄入湘陰城

駱巡撫派升用同知直隸州王鑫統帶練勇竝飛咨
曾侍郎派文生曾國葆候選同知趙煥聯武陵縣訓
導儲孜躬在彬東橋新康一帶殺賊數百名焚賊船
十餘隻儲孜躬聞賊分擾甯鄉商同趙煥聯馳往衝
殺進城賊始下竄其靖江橋口賊船亦迎擊獲勝

三月皖逆竄擾山東臨清州

河北賊勢已窮蹙惟屯紮各邨莊亡命固拒計剋期
可擒乃金陵逆首密令安徽逆衆由豐工偷渡黃河
竄擾山東金鄉縣知縣楊鄭白全家殉難賊復進撲

臨清州城欲分我軍勢冀抒卑城諸賊之困僧王派將軍善祿等分兵迎勦三月十二日勝大臣亦奉

命督兵至臨清數戰皆捷殺賊千三百餘得首二百餘級生擒五十名三月十五日賊用地雷轟陷西南正西城牆數十丈漲燄灼天賊譙擁入城官兵因北門不啓不得入遂致失守升用知府臨清州知州張積功臨清協副將德慶署副將慶順參將吉興游擊阿克陳阿王用安都司武殿魁希奎千總馬誥均陣亡賊之初入東境也巡撫張亮基分遣將弁堵禦因奏報

失實革職遣戍以崇恩爲山東巡撫至是與勝大臣
善提督祿均奉

旨革職戴罪自効

湖北德安諸郡縣陷於賊

自吳總督歿逆黨踞漢陽遣賊目溯江直上陷岳州
武漢上游援師以絕賊由襄河進陷德安府及隨州
東陽縣署總督台將軍湧督師駐隨州武昌之門不
啓學使青侍郎麟自德安晉省與崇巡撫綸會籌防
堵崇巡撫聞訃丁憂青侍郎接巡撫任惟統標兵千

餘人固守而已湖北諸城殘破不可勝數施南鄖陽以山僻免害形勢之地惟荊襄存

河北軍克復臨清州城

逆匪陷臨清後堅伏不出我兵疊次轟擊三月二十五日三面猛攻盡埽城外賊壘二十六日丑刻踴躍登城立斃賊匪多名州城克復賊向南奔

四月勦臨清逸出餘逆殄除淨盡

逆衆自臨清竄冠縣鄆城均經痛勦復占踞曹縣起築木城以圖拒守四月初九日勝大臣督兵連破賊

巢勢窮出竄馬步豫伏邀擊追至漫口支河逼溺入
水僞丞相曾立昌許宗揚均淹斃僞副丞相陳世保
先於冠縣燒斃全股髮逆悉數殄除無漏網者東境
肅清

僧王攻克阜城縣賊竄連州

阜城逆衆自勝大臣分兵臨清後僧王屢次攻殺斃
賊已衆四月初九日夜全股南竄僧王督馬隊追勦
殄獲多名逆竄連州占踞連鎮我兵四路圍攻勝大
臣亦自曹縣移得勝之兵赴連鎮合勦

楚南水師大捷於湘潭焚賊舟殆盡

逆黨由長江上踞岳州溯流至銅官渚逼近長沙賊船屯泊靖港曾侍郎派勇至靖港接仗賊已由間道暗襲湘潭縣城徧擄商船將沂湘江通兩粵長沙危在旦夕曾侍郎飭水師揚載福彭玉麟等往援自四月初一日接仗起分隊開礮攻勦用火箭焚燒賊船六彭玉麟等伏坐小船往來督戰三日之間燬賊船六七百隻斃賊千餘名賊退入城

塔參將克復湘潭縣

湖南撫標參將塔齊布性果毅耐勞苦曾侍郎特薦之使與守備周鳳山督陸軍攻湘潭三月二十八日於檣礮如雨之中逼入賊營縱火焚燒殺賊五百餘名生擒二十餘名燒斃無數二十九日賊兩次出撲塔齊布等縱橫血戰立斬僞帥先鋒九名殺賊千餘名追至嶺下水邊逼溺無數四月初一日破其城外木城斃老賊數百人適水師大捷初三日賊竄回城訓導江忠淑設伏城隅開城接應塔齊布揮軍直入將城賊盡數搜殺立復縣城綜計水陸斃賊不下萬

人解散之眾亦以萬計餘匪遁西湖自克湘潭逆鋒
大挫全楚軍氣始揚

荊州官軍擊敗逆黨於龍會橋

長江已爲逆往來道荊州當四路之衝至省道梗一
切軍務

特詔荊州將軍今

封一等伯爵

欽差大臣文華殿大學士湖廣總督官文統之隨州棗陽
之賊於三月二十八日陷安陸府四月初六日陷荊

門州窺荊州竝句結監利時首二邑土匪是時滿綠
諸營兵大半分防要隘守城僅二千人而駐紮巴東
利川之四川松潘建昌二鎮漢屯官兵奉

勅調未至有雲南普洱營游擊王國才署龍陵營參將佟
攀梅爲湖廣吳總督檄調以道阻不得赴省行次荊
州官將軍一見偉其略奏畱差遣適賊至遣王國才
等督帶官兵一千二百餘名配帶江陵練勇五百人
爲先驅分扼龍會橋了角驛等處四月十三日逆衆
直撲龍會橋承平日久練勇皆閒散游民見賊色動

國才拔劍奮身曰今賊如濤湧不進何處求生活遂督親兵數十人挺矛入賊隊斬其慙大呼後陣兵勇曰退一步者斬佐領玉貴等奮勇直前斃賊甚多逆衆先於橋北民房內設伏王國才派千總畢金科拋擲火彈燒燬民房斃伏賊百餘名賊始敗退追至馬陸山復經副都統貴陞率協領功額訥等從樂壤橋板橋二處堵截佐領貴鳳等帶兵接應三路合隊槍礮齊施殺賊千餘名追逐二十餘里十八日逆衆復竄至浩子口又經佟華梅等擊斃百餘名生擒十數

名奪獲大礮擡槍無數餘匪四散逃竄重鎮遂安

湖廣台總督勦捕應山逆眾荊州軍克復監利縣

荊州台將軍湧接吳總督任勦辦北路之賊疊次剪
除收復德安府雲夢縣逆眾竄併隨州復至應山縣
台總督督兵於縣北一帶分三隊進勦飭知縣聶光
鑾帶鄉勇分兩翼以防旁抄賊以四五千來撲擊
殺無數斬首八百餘級生擒二百餘名賊棄馬匹器
械四散奔逃復於楊家岡遇伏擒戮殆盡北路賊勢
少衰南路之賊竄踞監利縣官將軍派隊往攻斃賊

三千餘人於四月二十八日克復縣城

五月克復宜昌縣

附近荊州各屬皆爲逆匪蹂躪官將軍派撥兵勇往
勦所至有功而荊州敗匪復聚竄上游四月二十二
日陷宜昌府官將軍派副都統貴陞協領依西布投
効廩生張于銘等帶兵勇一千餘人前往會宜昌鎮
總兵訥欽署知府吳開陽等連戰獲捷於五月初一
日收復府城賊又下竄十三日距荊郡數十里復派
王國才督帶兵勇進紮箐箕垵相機迎勦賊不敢下

由太平口竄往洞庭湖合股犯常德府

連鎮逆竄陷高唐州

逆匪自獨流阜城被創後窮蹙四竄裹脅雖衆一遇官軍崩角投誠諸大臣許以不死且酌獎之賊翼從益衰而長髮老賊自知惡稔罪盈無生還望死拒於連鎮五月初二日分股南竄逆匪未知曹縣股匪已殄滅尙圖勾結故竄入山東高唐州知州魏文翰罵賊被戕勝大臣督兵追及逆匪不暇分踞邨莊全股入城困守

荊州軍克復石首縣竝湖南華容縣

監利旣克探報賊聚湖南華容縣攻撲石首縣城官將軍以石首界連荊州恐致延蔓卽飭投效鹽經歷吳振鏞軍功黃鵬程文生李光榮等帶監利得勝之兵授以機宜竝督率礮船於五月初二日駛往石首斃賊三百餘名溺斃無數克復石首縣追至華容攻入縣城斃賊多名收復縣城餘匪乘划船向洞庭湖遁去

楚軍勦賊獲勝

漢口逆船四百餘隻五月初十日竄赴下游磯窩砌築土城欲占要隘青巡撫麟派都司楊昌泗往勦副將書紳副都統魁玉等接應蹋毀土城焚賊舟一百餘隻奪獲二十餘隻斃賊千餘人磯窩肅清同日賊由漢口分撲塘角又由鸚鵡洲分撲鮎魚套均駛船渡江而來亦經總兵候風岐抵禦楊昌泗回兵掩殺擊沈三十餘船賊始退竄

皖軍攻廬州獲捷並克復六安州

和提督春福漕督濟先後奉

命援廬州未至而城陷福漕督調撫安徽與和提督會兵
三年十二月駐店埠是年二月進駐三里岡明攻暗
襲屢有斬擒五月十二日冒雨揮兵殺賊一千餘名
十三日再戰梟其賊目城外賊壘以平其分踞六安
州者經署知州茅念劬於十六日督帶民勇攻克賊
尸徧野餘匪悉數殲除

湖南常德府失守知府景星死之

湘潭逆匪敗遁西湖五月十三日陷龍陽縣由滄港
白沙市而進直至常德府提標兵潰致府城於十六

日失守知府景星殉難士民被焚掠極慘逆匪復竄至辰州府之辰龍關經兵勇勦退其靖港賊船聞湘潭賊敗亦喪膽下竄至是水陸各賊均踞岳州

楚南軍追賊湖北崇陽通城界

水陸逆匪全數下竄有由醴陵小道逸出者結聯湖北通城之賊乘間南竄駱巡撫遣守備徐統緒知縣陳鑑源訓導江忠淑馳赴平江縣分投進勦望風披靡遂合諸帶勇員弁乘勝搜捕抵湖北崇通二邑界六月武昌城陷布政使岳興阿按察使曹懋堅糧道李

卿穀死之

自逆黨踞漢陽後武昌省垣危若累卵然賊志獨在
長沙欲據上游爲破竹勢故省垣尙保乃屢敗衄乃
渡江分擾五月有磯窩等處之捷賊未受大創旋復
全力圍城時青巡撫麟所統止千餘人涼州高州二
鎮兵屯城外名雖爲援實僅能自守居民亦遷徙殆
盡守陣卒不敷雉堞數青巡撫素得兵心饌紬數月
以家蓄金玉珍物充犒賚不足又取所善衣裘以代
之援絕食盡親與士卒啗糠糲困守孤城眾不忍舍

去六月初二日城陷藩司岳與阿臬司曹懋堅糧道
李卿穀均殉難青巡撫將自縊衆擁之出欲赴荆襄
無路可通乃與魁王楊昌泗南走長沙繞赴荆郡棄
城越境之罪無以自解奉

旨正法

荊州所調四川兵克復潛江縣並勦除龍灣等處餘匪
四川松潘建昌二鎮漢屯官兵奉調赴荆六月初六
日由了角驛行至近潛江之廖家橋遇賊接仗松潘
總兵雙保督戰斃賊八百餘名生擒長髮賊僞軍帥

等七十四名潛江城賊出助截殺多名賊勢不支棄城逃竄克復潛江縣其龍灣等處餘匪亦經官將軍派撥員弁督同鄉練勦逐無遺

荊州軍克復沔陽州

武昌既陷上游震驚官將軍派撥兵勇自荊州下勦六月二十五日五品軍功卽選知縣林天直會同沔陽州知州蕭蔭恩殺賊多名克復州城又殺賊於段家場通海口林天直復會守備銜黃鵬程等勦捕洪湖仙桃鎮黑牛渡各賊巢亦疊獲勝仗

楚南軍克復岳州

賊自湘潭受大創全股退踞岳州設壘毀橋意圖久
抗六月二十八日湘勇水師營官道員褚汝航等率
各營進勦知縣彭玉麟都司楊載福伏舟於君山雷
公湖遣文生何南青以疑兵誘賊出戰伏兵盡起攔
腰併擊賊始宵遁我兵七月初一日入岳州府城
七月楚南水師先勝後挫陸軍復大捷陣斬偽丞相曾
天養

七月初一日復岳州水師仍分泊南津港君山一帶

初三日逆匪由城陵磯悉銳來犯我軍分五隊迎敵
彭玉麟由湖西抄尾擊斃僞丞相一名楊載福由湖
東進親執長矛刺死僞丞相汪得勝褚汝航督大隊
窮追將股匪全數殄滅獲船七十六隻斃賊千餘人
生擒一百三十四名燒斃溺斃不可數計其陸路之
賊亦經提督塔齊布擊盡初六十四等日再戰於道
林磯羅山彭玉麟裹創陷陣所至有功十五日曾侍
郎偕山東登州鎮總兵陳輝龍廣西升用道李孟羣
各駕師船抵岳十六日陳輝龍乘南風出隊迎擊於

螺磯乘勝進追船身膠淺陷入重圍欲歸風逆收隊
不及與游擊沙鎮邦均陣亡運使銜卽用道褚汝航
運同銜同知夏鑾廣東千總何若澧等駛船往救亦
同特受傷遇害是役也陣亡官兵弁勇數百人水師
中前後三營失船三十餘隻賊思逞志上犯經左右
水師營楊載福彭玉麟竭力扼守時陸路塔提督亦
戰勝賊鋒稍挫乃重整舊旅以褚運使所餘戰船奏
派州同俞晟管帶改名清江營隨同攻勦十八日塔
提督揮隊猛進直抵賊壘突有獮髯深目賊酋槍傷

坐馬親兵黃明魁用矛刺翻梟其首賊衆潰走追殺
八百餘名後克復武昌閱僞文知賊酋爲僞丞相曾
天養賊中之最狡健者時湖南駱巡撫以水師得力
新有損亡奏委同知銜知縣唐際盛等捐造戰船以
資協勦

之軍克復京山縣安陸府

武昌失陷時台總督湧尙在德安奉

旨視職以楊總督需代之時京山土匪勾結髮逆竄陷安
陸府官將軍派四川建昌鎮總兵福忻同知銜張于

銘督帶兵勇由荊門州馳往並經安襄鄖荆道羅遵
殿派撥弁兵於五月二十日先將京山縣克復進攻
安陸府楊總督飭都司劉富成等會同代辦知府方
卓然夾擊並令守備石清吉帶兵密往潛伏東門外
劉富成等督兵進勦城賊抗禦伏兵齊起逆眾驚惶
逃竄七月十六日克復府城

荊州軍克復天門縣及沔陽州所屬之仙桃鎮並收復
下游各縣

官將軍派四川署松潘鎮雙保攻天門縣七月十八

日至漁新河沈擊焚燬賊船八十餘隻二十二日抵
縣攻擊適安襄鄖荆道羅遵殿派縣丞袁政代辦安
陸府前天門縣知縣方卓然管帶練勇踵至兩路夾
攻雙保親督兵勇殺入克復縣城生擒逆首孔昭文
等正法餘匪下竄其竄踞仙桃鎮者經沔陽州知州
蕭蔭恩竝官將軍派往之候選知縣林天直等合軍
攻擊於是月十五日破其賊巢漢陽黃州二府所屬
各縣亦經各守令會督兵勇鄉團齊心殺賊孝感之
賊最悍知縣李殿華會同軍功李玉田擊勝二十六

次始復縣城黃陂縣於二十三日麻城縣於二十六日一律收復賊均竄黃州

江南軍擊破高淳縣賊

初江蘇巡撫許乃釗接印駐金陵大營嗣上海另股土匪滋擾由大營抽兵督往勦辦旋因久未攻克削職仍畱向大臣營効力吉爾杭阿接江蘇巡撫任駐上海勦賊金陵復分兵助之金陵首逆偵大營兵力稍薄密糾蕪湖逆黨乘船下駛潛圖東壩向大臣遣副將傅振邦三品頂戴福興等迎拒之水陸均捷於

二十五日克復高淳縣金陵逆又分股撲七橋甕等處大營爲將軍蘇勒通阿參將張國樑蔡應龍等勦退數日間以少擊多三戰三捷

閏七月楚南軍水陸大捷逆衆潰回武昌

岳州再捷後陸賊駐高橋塔提督匹馬直赴賊營周視形勢閏七月初二日派知府羅澤南知縣李續賓等直撲高橋賊營賊奔城陵磯我兵追勦逆出隊二萬人拒敵塔提督策馬衝入湘勇繼之適大雨如注東南風大作乘風猛撲隔竹簽數丈濠溝兩重大呼

躍入殺聲與風雨聲相應震動天地其前後蹋毀賊
營十三座斃賊二千名陸軍旣勝水賊喪膽曾侍郎
飭升用道李孟羣率前左右三營水師奮力追勦羣
逆驚竄時已昏黑暫泊擂鼓臺下黎明從荆河順流
而下東岸之旋湖港芭蕉湖道林磯鴟欄磯西岸之
觀音洲白螺磯陽林磯螺山夾洲一帶其蹋平賊壘
九座礮臺三座遂駐螺山自此由荆入川由岳入湘
之門戶始固

楚軍會湘軍收復嘉魚蒲圻縣

涼州副都統魁玉高州鎮總兵楊昌泗隨青巡撫退
至荊州奉

旨革職畱荊差遣楊總督奏議三路進攻派魁玉等帶兵
由襄河直下官將軍以監利之螺山地方賊船甚多
北岸礮勇單弱飭令魁玉楊昌泗及揀發參將恒泰
扎勒罕管帶鎮筸兵一百九十餘名挑選川楚勇四
千一百餘名由大江螺山進勦會同湖水陸各軍收
復嘉魚蒲圻二縣下攻花園

江南軍克復太平府

金陵逆分股嘯聚於太平府勢張甚鎮江逆亦久困
思竄議遙爲援應同犯大營向大臣訶知其約乃調
副將傅振邦參將張國樑爲一隊副將明安太游擊
穆大本爲一隊參將張騰蛟長桂爲一隊將軍蘇布
通阿福興提督余萬青劉開泰等爲一隊分四路抵
禦親督兵上方橋接應是月十四至十八日逆各路
分撲我營余萬青劉開泰敗鎮江賊於北固山甘露
寺斃賊四百餘名明安太穆大本張騰蛟等亦連破
出巢窺伺之賊其由雨花臺洪武門出撲七橋甕者

蘇布通阿擊卻之穆大本回騎斜刺入賊隊斬其黃
衣悍目張騰蛟長桂福與搜勦城廂匿賊斬首千餘
級三面皆捷第一隊傳振邦張國樑直攻太平之壘
張國樑首先衝入計殺賊四千人會同太平府知
府李三捷當塗縣知縣王乃晉乘勝抵城下蹋平賊
壘焚賊艇八百賊衆填濠溺水者不計其數槍斃其
僞國宗韋得玲僞檢點陳贊元僞將軍李長有僞總
制吳春和遂於七月十四日克復府城

揚州軍擊瓜州逆獲捷

自克復揚州後鎮江瓜州二逆勾連負壘爲犄角琦
大臣以疾薨於軍奉

旨以江南將軍托明阿爲

欽差大臣督辦揚州軍務未至二十八日逆黨糾合數千
賊巡撲大營陳提督金綬遣副將鞠殿華侍衛穆克
登額德興阿分途迎拒親督馬步左右夾攻當者立
踣計斃賊一千餘名生擒五十餘名奪獲刀矛槍礮
各若干兼斬其黃衣賊目逆鋒大挫而我軍無一人
陣亡者

皖軍克復英山縣旋復失陷

和提督福巡撫會兵攻廬州月有斬馘而城大賊悍
兵力不敷環合壽春鎮總兵全玉貴最驍健單騎直
抵城下受礮傷逾數月亡兵心慚懈時安徽徧地皆
賊乃會議以重兵屯東北面撥勁旅會督團練分巡
各郡邑英山縣於上年冬間被賊竄擾經六安州知
州李元善督勇進勦閏七月二十二日伐樹梯城而
入克復縣城英山處皖楚之衝逆衆時所往來旋復
失陷

楚南軍收復湖北通城縣

管帶湘勇知縣陳鑑源等由平江趨楚境駐營通城
六七月內逆疊出撲均經擊退我兵連次攻城逆勢
不支於閏七月初七日夜潛開城門由東北逃竄遂
復通城縣

金陵賊因乏糧驅婦女出城

自廣西永安以迄金陵賊中婦女各立一館以僞女
官管束雖夫婦母子不相通至是各路攻勦賊糧漸
盡乃於閏七月二十七日詭言令婦女割稻將無力

無色者盡驅出城聽其自散後於十二月內盡括年十五以上五十以下之婦女指配給賊不從者殺之有志婦女紛紛自盡死者萬計

八月荊州軍會楚南軍克復崇陽縣旋復失陷

楚南軍自克復岳州後屢戰月餘本可乘勝東下因陸路有崇陽大股之賊水路有倒口襄河之梗遂定議塔提督勸崇逆曾侍郎率水師把總秦國祿州同俞晟徧搜支湖小河屢有金口羊樓峒之勝八月初一日破崇陽蒲圻交界之分水坳賊卡塔提督與羅

澤南等竝官將軍所派補用知縣吳振鏞守備黃鵬
程等分路而入一由北路分水坳一由南路桂口初
四日會師崇陽城下從西北二門肉薄以登生擒偽
丞相金之亨等十一名立復縣城惟逆首廖二在逃
塔提督令吳振鏞黃鵬程暫駐崇陽會同署崇陽縣
知縣鈕芳津招撫流民搜捕餘匪詎廖二勾結餘黨
回撲縣城十一日復陷吳振鏞黃鵬程鈕芳津均巷
戰陣亡

楚軍收復黃州府屬各縣

湖北楊總督一軍勦滅安陸股匪後飭游擊趙鴻舉等分路赴下游截擊八月初三日收復蘄水廣濟二縣其羅田縣城亦經知縣彭中芳等收復

曾侍郎督水陸大戰同日克復武昌漢陽兩城竝楚軍收復黃州府武昌縣

賊守城之法不守陣而守險其精悍者悉聚城外南岸金口入漢之路以花園爲險外瀕大江內枕青林湖逆立大營三座安礮百餘尊累累如置碁向江者阻我水師向南者阻我陸軍北岸沌口下游蝦蟇磯

賊營亦如之沿江賊檣林立逆酋驍健者以五采飾其帆粲若雲錦八月二十一日大軍自螺山下勦先飭楊載福俞晟前察形勢賊卽率船上犯楊載福等捩柁擊之賊旋敗退曾侍郎慮此關不破則各路均難措手因將水師分爲前後兩班前班衝過鹽關至鸚鵡洲抄繞而上後班復排轟而下並懸重賞能得五采帆者錢十萬各軍奮力駛入頃刻獻采帆六賊勢不支官軍縱火燒之賊船二百餘隻焚燬立盡其攻花園之陸路分三路同進李續賓攻江邊之營羅

澤南攻湖邊之營教諭唐訓方及荊州帶勇官李光榮所領川勇千人攻中路之營諸勇或越高牆或穿礮眼而入官將軍所派之魁玉楊昌泗攻蝦蟇磯者亦怡衝進土城同時縱火與江中焚船之火煙燄相合天光殷赤凡沿江木柵悉用大礮轟除又攻破漢關及白沙洲各賊營李孟羣親率各營進攻武昌望山門外之鮎魚套口延燒火藥大船霹靂一震眾船皆飛賊尸有自半空落者是夜收隊稍息二十二日進攻一如上日之猛諸士卒無不以一當百血肉雨

飛凡大戰兩日焚盡上下賊船武漢城外無一戰壘
賊於四更後開門逃竄塔提督遇於油坊嶺勦殺無
算李孟羣蕭捷三彭玉麟俞展各分途由文昌漢陽
望山等門而入漢陽一城亦經楊昌泗攻入兩城克
復午未之間耳餘賊四散潰竄楊總督飭黃州府知
府許廣藻等帶團追勦收復黃州府城對江之武昌
縣亦經知縣白潤糾約紳團收復

四川按察使胡林翼調湖北按察使至楚辦賊

胡臬司林翼湖南益陽縣人起家翰林改官貴州知

府補黎平擢貴東道咸豐四年率黔勇勦賊四月自湖北通城援武昌六月升四川按察使仍留湖北軍營七月爲湖南駱巡撫秉章奏調赴岳州防守是月調湖北按察使至楚辦賊

九月皖軍收復廬江縣

皖軍克英山後逆踞廬州如故竝分黨四出抄掠廬江近邑被擾尤煩民皆憤激有團賊志相結爲團應官兵和提督福巡撫計先取廬江挫賊鋒適練首貢生吳廷香聞道至遂議定進勦兵民爭先殺賊文生

姚克厚等內應一鼓而擒其僞監軍任大綱竝賊首
十七名遂收復縣城

楚南陸軍克復興國州大冶縣水師大勝於蘄州

下游逆賊知官軍分路進剿從田家鎮糾黨六千餘
人半由興國分抄大冶以拒武昌官軍半踞興國以
拒金牛官軍羅澤南等馳抵興國境遇賊追殺十餘
里遂克州城塔提督赴大冶怒馬衝陣立斬逆首於
馬下由縣城北關追至南關斃賊千餘蘄州賊黨窺
我水師距陸軍稍遠將圖撲犯楊載福彭玉麟會商

乘其未至而擊之直抵蘄州酣戰逾時燒燬賊船九十餘隻以陸軍未至而還

十月揚州軍破賊於浦口賊壘悉平

賊於金陵對江九洲洲下之浦口排木爲柵聚石築壘火藥器械戰守繕備冀以老我師而延殘喘將軍托明阿誓必先平浦口賊庶江南北呼吸可通遂密約向大臣派員接應兩路夾擊初八日督飭總兵武慶李德麟等各帶兵勇由金湯門外五路齊進經過新塔浮橋直擣賊巢所向披靡金陵賊飛檄來援方

分兵迎堵而艇船忽排列江上則向大臣之水師已
飛截破浪至矣合圍分勦殲斃無數賊捲土遁削平
其壘

楚南軍蹴半壁山賊壘破之進拔田家鎮收復蘄州

田家鎮之東有半壁山孤峯峻峙俯瞰大江一夫守
之百人聘昨楚軍由蘄黃東下寶慶勇先進少挫羅
澤南奮率湘勇孫升拔其木椿竹籤踰溝而入塔提
督李續賓繼進斬擒幾及五千尸橫徧野時水師因
蘄州未下日事攻勦互有傷亡曾侍郎慮陸軍勢孤

派楊載福彭玉麟秦國祿孫昌凱俞晟等水師衝蕪
州賊壘而下至田家鎮會陸師賊於半壁山置橫江
鐵鎖四道攔以木簾徧列槍礮楊載福等定議分水
師爲四隊第一隊以洪爐大斧鎔鑿鐵鎖第二隊專
以礮攻護頭隊第三隊俟鐵鎖開後駛至下游乘風
縱火第四隊守營各勇依令竝舉楊載福孫昌凱等
鎔斬鐵鎖駛舟驟下縱火反燒煙焰蔽天礮無虛發
軍無停刃燔賊舟一萬有奇沈尸塞流遂拔田家鎮
賊遁九江追至武穴而還蕪州賊首陳玉成棄城竄

往廣濟陸路塔提督等由田家鎮渡江追之

十一月塔提督克復廣濟黃梅二縣

賊首陳玉成竄至廣濟聯合偽燕王秦曰綱偽丞相
羅大綱等分守各要隘塔提督渡江後由菩提壩蓮
花橋節節進剿克復廣濟賊衆退踞黃梅黃梅爲湖
北江西安徽三省總匯之區三賊首併力死拒以萬
餘賊守小池口抗水師以數萬賊踞城西之大河埔
以萬餘賊紮北城外又以數千賊游弋聯絡之塔提
督與羅澤南周鳳山等於十一月初一日自廣濟進

至雙城驛距大河埔十里賊乘立營未定率衆來撲
我軍奮登山岡衝殺而下追至大河埔立將賊壘蹋
毀初四日破新橋之險直逼城根四面勦殺鮮得脫
者塔提督頭受石傷裹創猛攻賊從小南門化龍門
縋城而遁遂克黃梅

楚北賊略平

初武昌之陷江以北襄以南城邑皆賊巢荊州當七
省阨塞內襄而外江人心皇惑旦夕莫保官將軍持
勦撫策將弁所到誅其豪酋寬其黨翼父老攜壺漿

以迎

王師賊亦受懲創遁又遣副都統以下分城謹門關詰察
姦宄令肅風清大將用前涼州副都統魁玉前高州
鎮總兵楊昌泗佐會侍郎克復武昌以功著客將重
任王國才佟攀梅部將首擢烏貞額塔那布發什尙
額至於埽蕩沙湖逋藪收潛江河陽監利石首諸州
邑則委任帶勇官林天直吳振鏞黃鵬程李光榮皆
一時之良也故居中坐鎮四邊不震驚於逆烽至是
外侮盡驅內訌亦息遺民慶再生焉

臨淮軍勦捻匪巖定督攻粵逆奪復桐城二關

捻者捏也不逞之徒聚捏成隊肆劫掠俗謂之捻子
各聚其處江南則淮徐海安徽則潁亳壽河南則南
汝光山東則兗沂曹濟湖北則襄棗鍾隨以各省論
皆屬邊界以大勢論則居天下之中譬之雞卵中黃
獨堅故此數十府州縣之民類多慄悍承平之際僅
與搶竊盜等耳兵興後粵逆聯爲一氣或令分擾以
掣我兵或令前驅以助其勢何慮千百股與粵逆相
始終初稱亂於淮河袁京堂甲三駐兵臨淮關勦之

自成一軍殄戮極衆時各捻竄定粵匪由廬州分踞舒城竝於桐城大小二關扼險爲守以阻我南路之師二關爲安慶通衢官兵收而復陷者屢是月袁京堂派參將劉玉豹四品頂戴舉人臧紆青等進勦初四日擊賊於茶葉嶺勝之在籍知府葉法助戰又勝於斛樹嶺白沙嶺自午至酉連奪兩關初五日又破賊於呂亭驛斬其目吳鳳珠等十二名進抵桐城城下十一日廬江賊糾合安慶之賊來援臧紆青與千總郭錦伏勇於天靈莊斃賊數百復抄至賊後兜戮

殆盡十四日潛山援賊至復擊斃五百餘名十七日再戰各逆前後圍裹賊紆青衆寡不敵力竭陣亡劉玉豹馳至始勦散

九江逆匪勾合田家鎮餘黨竄擾江西吳城

逆匪自楚軍攻破田家鎮後屯聚九江對岸之小池口並有賊黨自安慶來援江西總兵居隆阿兵勇潰散十一月初五日大股竄入吳城經江西陳巡撫啓邁派都司吳錫光等水陸夾擊追至南康府城下前後斃賊二千餘人焚賊船三十餘隻餘匪逃往湖口

十二月會侍郎督軍獲勝於九江湖口

逆匪自黃梅受創後糾合安慶新到之賊盤踞孔壠驛小池口與對岸九江逆相勾連李孟羣率水師會合各營七戰七捷潯江賊船焚盡塔提督羅澤南李續賓等由北岸督兵進至濯港遇賊衝殺賊尸山積塔提督率諸軍攻孔壠破其土城逼賊入泥淖中復縱火焚街市賊無一得脫生擒長髮老賊七十九名僞丞相總制等多名孔壠既破小池口之賊亦遁乃調陸路渡江攻九江府城水師各營乘勝進規湖口

巢縣

九江城賊襲我水師塔提督血戰獲勝

十二月二十五日九江城賊見水師戰船集北岸連營二十餘里聲威甚壯乃於是夜以巨舟自焚於南岸水營開礮轟擊南風微起礮煙迷江不辨上下賊用小划奪我戰艦率衆犯陸營塔提督血戰獲勝水師退上游遏守

湖廣總督楊需失利於廣濟逆黨復回竄漢口鎮直入襄河

楚南水陸各軍已復蘄黃諸城邑直下湖口分兵攻九江城各路敗賊收合潰散竄至黃梅楊總督親率兵勇往翼一鼓而滅駐廣濟縣值歲除軍中置酒高會賊大至官兵方派隊出禦營中已火起楊總督親隨將官李士林力鬪突重圍保之出已斷後死李士林曾從賊投誠後受楊總督恩故得其捍衛乘別騎馳至漢口鎮派豫勇一千五百人守蔡店楚勇三千駐楊店自率各標兵勇六千餘趨德安防賊北竄賊旋於次年正月初七日至漢口遂進襄河十四日上

賊曾羅大綱趨救大戰於梅家洲水師屯八里江更番迭戰焚燬小河木簾敗船殆盡十二月初十日復攻燬沙洲賊壘浮橋簡舳板小船駛入鄱陽湖內兩岸賊眾突出焚我八里江水營李孟羣等率戰艦退紮九江

皖軍克復含山縣

福巡撫等久攻廬州不下欲斷其接濟而東南一路通巢湖運賊糧不絕計惟以偏師先取含山巢縣始能致其死命以地追勢險難其人翰林院李編修鴻

章合肥人有膽識嫻韜略先爲呂侍郎賢基奏帶赴皖今

封一等伯爵江蘇巡撫署兩江總督時在廬州戎幕慷慨請行福巡撫壯之令帶衛千總莫青雲等練勇會佐領輯順帶吉林馬隊繞道赴含山十二月初九日督兵勇進攻二十四等日三戰三捷十五日攜帶攻具梯繩直至城下分門攻擊逆尸紛墮忽城內火藥震發延燒民房賊自驚亂兵勇攀登擁進合力兜剿先後斃賊二千餘人生擒十三人遂克縣城移兵攻

犯漢川復擾沔陽天門各邑

平定粵匪紀略卷四

咸豐五年乙卯正月江蘇巡撫吉爾杭阿克復上海縣
自三年秋另股土匪踞上海縣與粵逆通縣屬洋商
總埠百貨盈仞爲賦稅所出官兵攻勦累歲無功江
蘇巡撫吉爾杭阿督總兵虎嵩林參將富安守備向
奎等水陸進攻浙江道員石景芬等督兵勇會戰排
日攻擊四年十二月二十九日江甯府知府劉存厚
挖地穴成用城雷轟塌城垣二十餘丈正月初一日
各兵奮勇登城生擒逆首謝安邦僞元帥陳芝等首

逆劉麗川率死黨逃出虎嵩林等追至虹橋斬之上
海縣城遂復

楚軍水陸回援武漢

楊總督於廣濟敗退曾侍郎卽派通判俞晟領守備
洪定升等水師戰船湖北臬司胡林翼領陸軍回援
武漢賊至漢口卽渡襄河踞漢陽府城沿江設壘竝
於漢陽下游南岸嘴高築礮臺以阻下游之師俞晟
等督師船至楚正月十一日開仗毀其南岸嘴礮臺
斃賊多名泊船省城下游之塘角胡臬司擢湖北藩

司率陸軍駐上游沌口等處李孟羣水師由九江先
歸紮黃鵠磯曾侍郎復派知府彭玉麟水師至紮望
山門外鮎魚套戰船雲集屢出勦均獲勝

曾侍郎馳援江西

九江礮船已先後派援武漢其隔於湖內之舢板各
船聯絡成一軍爲內湖水師時江西賊入腹地饒州
告陷曾侍郎乃親馳西省籌辦並調羅澤南陸軍自
九江移師與內湖水師相依倚

僧郡王殄逆於連鎮河北肅清

四年十一月官軍勦洗連鎮鎮舊濱河分東西二鎮
西鎮已破盡焚其樓棚房柵餘賊悉斃水而東蟻聚
東鎮死守巢穴是年正月十九日僧王遣西都統等
分隊竭力驟攻破之生擒偽總制檢點將軍等逆魁
林鳳祥先已薙去長髮圖潰圍遁傷重不得出匿身
地洞汙泥中搜獲檻送京師凌遲處死賊之渡河爲
亂者僅高唐一隅僧郡王遂移得勝之師赴高唐會
勦

荊州軍擊仙桃鎮岳家口踞逆同知林天直副都統貴

陞先後陣亡

入襄河之賊自川沔以至天門各鄉裹脅出沒無常
備極狡譎官將軍先遣升用同知林天直沿途勦捕
賊所恃爲老巢者二曰岳家口隸天門縣曰仙桃鎮
隸沔陽州天直屢破賊有功正月二十一日至仙桃
鎮殺賊正酣突有騎馬賊偏身挿刃繪面挂髯猙獰
若厲鬼乘間掩襲天直倉皇搏擊身受重傷猶將賊
殺退收隊時血流如湧而死副都統貴陞亦殞於岳
家口副都統之未出師也將軍知其性卞急臨別戒

之曰天門潛江諸勦勇未集則無趣戰遂行二月初二日抵天門擊賊於漁泛洪大捷獲賊旗幟無數斬級百餘駐營南岸其北卽岳家口次日凌晨欲渡河將弁以諸勇未集請暫畱貴陞滅賊心急策馬先渡至岳家口殺賊一千有餘忽於街內突出賊數千名人馬奔騰我兵首尾不相顧致貴陞陣亡

二月僧王誘賊出巢收復高唐州

高唐餘匪日久稽誅勝大臣以遲延獲譴僧王自連鎮移師進勦正月二十九日夜密令南面守陣官兵

分開列隊停止更籌故作疏防狀逆果疑城外無防
兵全股南竄僧王伏兵於前與追兵合勦遂收復高
唐州整隊窮追狂奔至荏平縣屬馮官屯入邨踞守
三月初一日官兵一擁而前短兵相接立奪西面二
邨餘匪五百餘名蟻聚馮官屯東莊園之

江南軍討高資賊平其壘

鎮江賊數出窺伺是月初九日分股竄高資夾江而
陳內築臺壘外擱簾筏思以牽制官軍已革提督余
萬清總兵虎嵩林屢勦屢勝賊往來死拒竝擾及句

容十九日向大臣遣總兵德安四面合攻賊不能支
轟殲溺斃無數連日毀其土臺擊沈賊坐船七奪獲
小艇百餘賊遁入城

三月逆陷武昌巡撫陶恩培知府多山等死之副將王
國才援師入城旋退守城外署湖北巡撫胡林翼聚軍
上游圖進取

逆匪踞漢陽漢口爲犄角懼水師上下攻擊不敢渡
江武昌省城兵力雖單尙能自保陶巡撫恩培抵任
甫月餘率司道及武昌府知府多山嬰城固守胡布

政等水陸屢戰於小河口鸚鵡洲白沙洲逆鋒稍挫
詎逆衆遽由興國通山取道青山至塘角攻撲省城
胡布政李孟羣等正獲勝間瞥見省城火起鮎魚套
水營亦被焚亟馳援而城已陷陶巡撫多山及歸州
營游擊陶德壽等力戰陣亡是日副將王國才自九
江率隊來援三更時抵省不知城之已失也呼門而
入賊亦不知爲官兵直至蛇山之前兵與賊始相認
殺聲互起王國才因孤軍深入不敢戀戰退出紮營
城外胡布政於四更時結筏潛師渡江駐湓口收集

潰卒時饒益支絀乃發運私家穀濟軍歸者日衆軍始振旋奉

命署湖北巡撫遂調諸路軍會武漢以復城爲先而楊總督慮賊北竄奏令巡撫上扼漢川胡巡撫上方略言荆襄據東南形勝江漢又荆襄咽喉漢陽旣陷北岸已形梗塞武昌失守南岸又被蔓延惟急攻武漢一城獲而兩城必復乃可內固荆襄而外遏上竄之路疏入得

旨嘉納之

楚南軍克復江西弋陽縣收復興安攻克廣信府

饒州賊匪於三月初四日分股陷弋陽曾侍郎派羅澤南李續賓往勦三月二十日敗之於大水橋陳家山乘勝追擊克復弋陽賊退踞興安縣二十三日馳抵興安賊先逃竄入城安輯將赴廣信已於先一夕失守羅澤南憤甚二十七日馳抵城西之烏石山賊出城與我兵奪隘令佯爲拒守而重兵繞趨城根血戰斬其魁府城卽日克復

浙軍攻克安徽之徽州府及歙縣休甯婺源各城

徽州居環山之中地勢險阨賊未敢輕犯有土匪爲鄉導遂致失陷民受荼毒相約殺賊時浙兵出境防勦浙江金華府知府石景芬副將魁齡密啓浙江何巡撫桂清派兵會練進勦先攻東南北三門景芬督衆長驅如破竹勢逆黨聞風開西門遁追殺十餘里生擒賊目二十餘人土匪數十收復徽州府及歙縣城乘勝追復休甯縣賊由黟縣竄婺源向大臣派已革提督鄧紹良等會同石景芬並游擊周天受分門攻擊鏖戰三時之久城中練勇內應賊匪潰亂奔出

擒斬五百餘名生擒僞將軍將使司馬八名落水溺斃者無數遂克婺源賊又回竄休甯亦經鄧紹良周天受石景芬等攻克由黟縣石埭一帶逃竄浙軍會鄧提督追擊之

江南軍擊敗諸路賊於江浦

四年十月向大臣攻破雨花臺逼南門賊不敢由通濟門出是年三月督辦揚州軍務托大臣偵知北固山鎮江瓜州金山四路賊約期進犯遣已革總兵王鵬年等伏兵南北岸之七里九洑等洲迎擊破之斷

賊鎖船鍊二道獲其攜簞浦口水師亦隨至接應鏖
戰大捷焚賊船三百有奇諸路賊被創殲焉
荊州軍殲賊於岳家口仙桃鎮

自副都統貴陞陣亡省垣繼陷江襄郡邑賊蹤殆徧
官將軍分派佐領協領督兵勇迅勦岳家口仙桃鎮
二賊巢誅斬無遺又飭前涼州副都統魁玉同知銜
李光祿捕襄河南岸之賊上荆門下沔陽疊次有功
飛咨楊總督會勦賊之在襄河北者鍾祥京山防堵
亦嚴內則固保荆沙外則扼絕援賊

江西軍克復饒州府

饒州陷後分擾樂平德興弋陽等縣陳巡撫啓邁派都司吳錫光等率領水陸往勦三月二十八日圍攻饒州府賊出五隊來撲竭力擊散城賊由東門逃出水陸分東北兩路殲擒極多郡城立復

四月渡黃河逆眾悉俘獲於馮官屯北軍凱撤

高唐餘匪竄保馮官屯東莊僧王修築套隄引河水圍繞以困之四月十五日轟破賊壘生擒首逆李開芳竝偽職黃懿端謝金生等八名髮賊無一脫逃者

李開芳檻送京師與授僞職各賊均凌遲處死北軍
告藏後於五月十五日行凱撤典禮大將軍參贊大
臣恭繳印信關防京城巡防裁撤在事文武
賞賚有差

西安將軍扎拉芬會勦隨州失利陣亡

是時楊總督由德安駐隨州

旨調西安將軍扎拉芬由陝西統兵至襄陽會勦行至隨
州適湖北參將劉富成失利於長林港扎將軍督兵
前進四月十三十五等日賊由平林寺等處直犯隨

州扎將軍迎擊於五里墩殺賊千餘人逆匪愈集愈多身受重傷猶復裹創督戰擊賊退旋因傷重溘逝楊總督退守棗陽

江南軍進埽三山賊壘

托大臣督飭水師沿江埽蕩疊破賊船賊壘金陵上之三山爲濱江要隘逆匪以重兵據之致水師不能上駛三月二十八日向大臣派總兵吳全美德安副將李德麟等駕廣東紅單等船迤邐上駛紅單者廣東商船由造船商人稟海關給紅單以備稽察因爲

名前經江南調防海口爲水師之剽捷者吳全美等率之水陸會勦焚燬賊船二百餘隻奪獲拖罟多槳快蟹等船二十五隻大小礮八十餘尊生擒僞先鋒陳長順等六十一名四月十三日逆匪竄至江甯鎮被擊敗退十六日吳全美等揮船猛進搶上賊隄燒其水壘哨樓乘勢上山蹋平營卡王鵬年等將賊陣焚盡三山江面一律肅清水師棹行始便

官將軍總督湖廣

扎將軍陣亡賊於四月二十九日棄隨州陷德安府

豫境戒嚴德安府河一帶警報時至奉

旨楊總督革職留營差遣四月二十七日

詔荊州官將軍爲湖廣總督乃以將軍印交荊州副都統
載增署理飭署右翼副都統魁玉扼守襄河南北岸
防逆西竄趣兼理藩司鹽道常恩由宜昌率新募豫
勇一千名駐潛江爲德安應援部署定卽赴襄陽受
督篆

五月楚軍連破撲營之賊進逼武昌駐紮紙坊建議先攻
漢陽

胡巡撫之初署布政也卽分營金口及任巡撫派知府彭玉麟駐陸路堵賊南犯蔽湖湘而自率水陸兩岸防禦逆謀襲金口斷官軍糧道屢戰斬其僞總制丞相等逆復率大隊來撲整兵擊敗之乘勝直擣其壘屯兵紙坊進逼省城小東門逆閉門固守潛自他門出掠是月楊載福自湖南率水師來會聲勢漸壯胡巡撫慮相持無益遂建議云武昌城周二十里門有九合圍則兵數不足攻其一門則賊可輪環抗拒而外擾糧道此自困之道不如先攻漢陽以重兵扼

涇口蔡店要隘則竄襄之路絕濟江隄以水師爲腹背攻之則漢陽孤而城可破疏入

上嘉納之後奏功悉如所議

楚南水師在江西內湖勦賊疊獲勝仗

水師前自田家鎮駛湖口簡舢板輕舟燔賊船進鄱陽湖自大孤山以至都昌縣南康府當者輒靡會值水勢益涸賊以戰船塞湖口鐵鎖環之進湖之師船不得出遂與外江水師分而爲二自四月二十一日起至五月十三日曾侍郎先後派營官何啓長孫昌

國賀虎臣蕭捷三等殺賊於都昌城下及馬家堰土塘青山姑塘等處凡六戰斃賊數百名燒賊船約四百隻湖內肅清

浙軍出嶺勦賊克復安徽石埭縣

浙軍再克休甯出嶺追勦探知逃賊前隊踞石埭縣後隊由祁門竄走提督鄧紹良等督兵逕趨石埭奮勇登城殲賊二千餘人尸積衢市奪路逃出之賊追至城外琉璃嶺圍殺淨盡其逃往祁門者亦勦逐出嶺徽郡肅清

六月楚軍會攻德安城

楊總督前由棗陽走襄陽致隨州德安以次陷

特授察哈爾都統西凌阿爲

欽差大臣已入楚境官將軍亦行抵襄陽受總督關防軍

威復振逆嬰城固守不敢出初賊由府河入襄所過

州邑悉殘破官總督遣知縣李保邦李光榮沿港岸

伏礮叢葦處狙擊之轟碎賊艇殲斃無數襄圍協力

賊分途潰退六月初九日收復雲夢縣初十日收復

應城縣未復者惟德安一城而已固原提督孔廣順

督參將劉富成四面環攻斷其出入總兵楊昌泗署
布政使常恩奉官總督檄派員弁三路進一取皂市
一勦京山一駐沙洋爲兩路聲援兼杜回竄逆之翼
從益少始不敢窺伺荆襄

江南軍敗賊蕪湖重收太平府

於是太平已三陷矣沿江上下數千里殘破略盡兵
來賊去兵去賊來居民亦習常視之至是向大臣飭
張國樑等以全力攻之始得克復

七月湖南提督塔齊布卒於軍

塔提督由侍衛揀發都司存升副將在湖南疊著戰
功超升提督素以智勇著名所向無堅敵先會水師
追潯江逆黨爲所陷血戰以免南康青山間疊獲勝
仗以少制衆斬驍賊如摧枯振落是月備雲梯數百
乘撫簾竹盈布袋幾千具圖大舉七月十八日傳令
攻九江城未出師以力盡忽患心悸半日而卒
楚南陸軍大捷於義甯州復其城

曾侍郎聞義甯失陷孤羅澤南率全軍往勦七月初
八日破賊於梁口十二日抵碁盤嶺由嶺入州城有

二道正道頗平易賊堵禦極嚴越乾坑度小南嶺鼇嶺爲間道澤南取間道從前山中盤旋而入羊腸險途兵有難色澤南奮身促行令營官今廣東巡撫蔣益澧守乾坑率勇掩旂前進襲殺守鼇嶺之賊疾據山巔恐乾坑爲賊所困勒兵回援而益澧已獲勝收隊遂於十六日進薄州城不顧矢石登時克復斃賊四五千名賊之抗拒正道者分兵擊之棄柵壘遁去楚軍攻蔡店克之進拔漢口鎮逼漢陽城

賊踞襄河內之蔡店上通德安下達漢鎮互爲援應

七月初九日胡巡撫督知府彭玉麟分投進剿大獲
勝仗十二日克蔡店遂水陸併進十五至二十五日
奮力攻勦用火龍快蟹等船將襄河口鐵索浮橋上
下游賊船焚燬殆盡漢口鎮襄河兩岸賊巢全行蹋
毀竝將省城下游塘角賊船漢陽大別山賊巢一律
焚破初德安賊每日出濬潦掘地引水通府河泛艇
數百伏賊衆其內夜下行晝上竄眩耀鄉民曰此援
兵來自武漢者及官兵收復雲夢應城逆大恐二城
者府河出入要道也蔡店再克衆知無援德安之窮

賊益熾

江南軍克復蕪湖縣

蕪湖自咸豐三年冬復陷幾二載江皖往來道梗逆以爲上下關鍵水則聯艦陸則砌壘官軍乘屢勝威不能拔是月向大臣遣總兵吳全美德安明安太前提督鄧紹良等分道齊攻鏖戰旬餘斬賊近萬遂復縣城

楚軍收復漢川縣

胡巡撫旣破蔡店督軍攻武漢而漢川爲蔡店後路

賊游行衝突無已德安踞逆亦資以通聲息官總督
慮巡撫之軍腹背受敵遣副都統魁玉署布政使常
恩迅圖漢川時帶勇知縣李光榮李保邦分督礮船
正克分水背賊巢飭令乘勝下勦遂於十四日會同
克復漢川縣武漢首尾聯絡聲勢益張

楚南水陸各軍進攻江西湖口城克之收復都昌縣
逆踞湖口縣內湖水師相持數月未遽攻蓋地勢極
形勝而逆壘環抱星羅非東岸有陸兵不能得手是
月十一日同知李元度知縣李錕劉希洛帶平江勇

由南康渡湖十五日至文橋併力破之賊趨蘇官渡
又破之陸路之險隘已得乃會水師焚燒賊艇五路
夾擊賊於西門外陷坑內伏大礮因躍坑而過力破
守門悍賊遂克縣城其都昌縣城亦於十六日收復
於是湖口一帶無艘惟下鍾山賊壘未克而已

八月楚軍金口大營失利

胡巡撫攻克漢鎮其金口大營惟按察使李孟羣居
守詎宗通大股驟至勾連武昌城逆分道撲犯李孟
羣力戰四日衆寡不敵陸營失守水師勢孤胡巡撫

亦敗於麥山退保大軍山旋移營新堤賊勢復熾分竄漢陽各鄉及侏儒山竝繞道襲陷漢川縣

九月官總督赴德安督勦

西大臣與幫辦軍務荊州綿將軍洵等久攻德安未克兵勇屢次潰散奉

旨革職提督孔廣順逮問九月二十五日
授官總督爲

欽差大臣馳赴德安接受關防督辦湖北軍務官大臣時
因武漢緊急由中路馳援在京山途次接

旨卽馳往德安督勦

浙江甯紹台道羅澤南赴援武漢克復通城崇陽二縣
羅澤南克復江西義甯州奉官大臣胡巡撫檄調馳
援武漢九月初五日至通城賊移崇陽桂口之衆七
八千人屯於西門外築大木城拒我初六日破其木
城縱火焚壘賊奔西門我軍尾追守城賊以磚石下
擊兵勇冒死奪門而入斬馘三千餘人遂克縣城賊
竄崇陽約通山之賊入城助守澤南選擇精兵分作
數十隊設伏輪攻城中大亂遽開北門逃出兵勇截

殺千餘人又將崇陽收復

賊擾應城沔陽爲荊州軍擊敗之

漢川之賊分股竄擾應城縣之長江埠侏儒山之賊
竄至沔陽州之周家幫官大臣先派副都統魁玉都
司文瑞等由中路進兵兼爲荊州屏蔽魁玉等分馳
堵剿設伏誘戰斃賊五六百人逼溺湖中者無數餘
匪由原路遁回

十月皖軍克復廬州府

廬州爲安徽省垣僑治被陷已及二年和提督福巡

撫駐軍城外之三里岡大小數百戰屢勝不拔自本年入春以後賊援無日不至皆大受懲創而去我軍仍晝夜嚴攻十月初一日和提督福巡撫親自督陣總兵鄭魁士與守備馬昇平等潛至城根豎立雲梯都司熊天喜首先登城都司于昌麟亦由東門繼登副將嵩瑞等由東門殺進火箭拋入賊火藥局硝磺轟發賊首偽軍帥均被焚燒羣賊奪路狂奔適城中內應紳民王子顧亦在各門放火接應光可燭天呼殺聲震山谷逆眾自相踐蹋流血成渠逸出之賊和

提督帶馬隊馳至德勝門外全數截殺是日計斃賊
五千餘人割賊首二千餘級生擒僞官十七名長髮
賊三百七名遂克府城

楚軍克復德安府城

逆黨踞德安眾不過數千恃武漢爲下游與主襄府
二河羣匪蟻集官兵勝東挫西疲於奔走以是負隅
延息及官大臣督兵前往前大臣西凌阿等愧憤猛
力攻擊賊不能支先是脅從僞總制陸長年僞監軍
馬超羣不甘從逆欲爲內應而所部長髮眼目多恐

不成菹醢乃藉端戮老賊數人屢放難民出遣親信
潛赴大營告機密官大臣稔其誠購安陸人鄭蘭芳
蔡業廣僞爲從賊者混賊隊入城定計豫其謀者惟
麾下副將顏朝斌一人自前大臣以下秘弗令知是
月初四日大雨暴風我軍冒雨圍攻陸長年馬超羣
在內放火開門接應游擊馬天貴等首先奪門而入
賊衆爭逃我兵合力截殺殲斃無算入城安撫

楚軍克復漢川縣逆黨略平

逆之竄蹤靡定牽掣我軍者三路自隨棗至襄陽爲

北路武昌上下爲南路漢川中路尾潛沔首德安爲
尤要屢收屢陷官大臣旣取德安派西都統帶重兵
鎮之兼堵北路綿將軍督馬隊由天門馳赴仙桃鎮
提督孔廣順統鄖陽鎮竹山協官兵發長江埠抄新
溝兜擊魁玉錫齡阿李保邦蕭蔭恩等先後分四道
進兵齊集漢川十四日賊衆潰散克復縣城中路肅
清遂萃兵東下與胡巡撫合謀武昌漢陽二城

楚軍克復蒲圻咸甯二縣

羅道澤南分勦崇陽餘匪進駐蒲圻之羊樓峒逆首

石達開合悍賊二萬餘人自蒲圻分途來撲澤南派李續賓等迎擊之斃賊二千餘人十月十九日督兵進攻千總楊再佑等首先登城燒殺五千餘人蹋破賊營九座克復蒲圻縣逆復糾興國大冶之賊嘯聚咸甯縣十一月十一日黎明澤南等乘霧進兵鼓勇登城縣城遂克餘匪遁歸武昌省羅軍與胡巡撫會十一月楚軍水師破賊於金口沙口

武漢之賊聞官軍陸路大捷分賊由水路上竄金口楊提督水師自六溪口拔營派都司鮑超等由南岸

而下游擊李成謀由北岸繼發齊抵金口官大臣遣副將王國才由沌口出新灘協同水師營官鮑超王明山李濟清陳金鼇萬化林等分五隊圍勦賊礮子雨落鮑超等欲乘其憊令快蟹船迴環周繞百計疑之賊礮赤藥罄乃奮迅奔撲彈毬飛滾賊不能支泗水潰遁獲賊船無算焚燬亦多遂紮水師於大軍山是日陸師副都統都興阿亦敗賊於下游沙口焚其新築板屋上下游火光相望浮尸蔽江官大臣乃與胡巡撫商定令提督楊載福駐水師於金口分二隊

一扼上游一截下隘以慎江防將軍綿洵等領馬隊分駐蔡店等處杜北竄羅澤南偏師道嘉魚會胡巡撫攻武昌官大臣督李孟羣攻漢陽仍互爲應援以期必克

金陵逆匪大股出竄向大臣督兵殲除之

金陵首逆因瓜鎮屢被懲創意圖往援十一月十六日龍脖子等處出賊窺伺向大臣派總兵張國樑等由仙鶴門甘家巷一帶進攻逆以二三千人來撲張總兵從後路兜至縱橫抄擊斃賊無數黑龍江馬隊

四圍包抄斬賊一千數百人生擒二百餘人維時有另股由東陽竄至棲霞街焚掠張總兵繞至脾頭庵與總兵德安副都統順庭游擊李鴻勳協領武精阿等橫衝直擊斃坐轎賊首一名僞丞相周少魁等四十名追至石埠橋江邊十九日復會總兵秦如虎敗之於觀音門又斃賊二千餘人餘賊逃歸城中不敢復出

六合防軍攻破九洑洲賊壘

金陵逆於對江之九洑洲築石壘浚深濠悉銳守之

爲金陵援蔽賊竄江北每藉爲進步屢攻未克是月
升用知府留署六合縣溫紹原派都司秦懷揚千總
王家幹攻之乘大霧銜枚疾進越濠數重緣壘而入
賊覺死守竝分賊抄裹秦懷揚見事急欲自裁王家
幹力止之取賊礮置膝上實藥轟之羣賊駭潰隨克
其壘後因孤懸外江未能堅守復爲賊踞至同治二
年五月始克

揚州軍於瓜州外築長圍成

揚州官兵與瓜州踞逆相持已二年餘自托將軍接

任後轉戰無虛月而瓜州與鎮江一水相望兩城道
衆往來無阻竝時有合竄揚州圍北犯意托將軍遣
諭士民捐築長圍於瓜州之北以扼之是月成羣逆
水陸分撲我軍大勝奪其艍船生擒僞參護鄭金桂
等十名

鎮江軍轟塌郡城

江蘇吉巡撫既克上海移兵駐鎮江前提督余萬青
副之萬青先爲湖南提督守道州賊至委去論劾赴
大營自贖向大臣委令帶兵萬餘贊吉巡撫軍時吉

巡撫軍祇七八千人而余軍少紀律不得用總兵虎
嵩林副將周兆熊參將吳世斌李若珠知府劉存厚
皆上海得勝從吉巡撫來者顧弁兵尙少乃馳檄調
募又得武弁慶文師長鑣張汝琳陳一銘文員知縣
松壽鹽知事張翊國各率兵勇隸麾下與余提督分
營而立余營城東京峴山吉巡撫營小九華山復於
黃鵠山及京畿嶺築城置礮以逼賊是月爲地道轟
去城垣十丈餘城中賊死拒官兵不得入反乘間犯
我東戰營亦連戰卻之

江西收復各城池

湖北崇通餘匪竄入江西疊陷安福分宜萬載新昌等縣周藩司玉衡會同贛州鎮總兵阿隆阿護吉安營參將柏英等管帶練勇先後夾擊援應將各縣城卽時收復

十二月楚南軍大捷於樟樹鎮收復新淦縣

崇通餘匪勾結湖南茶陵州股匪於十一月初犯瑞州候補知府劉希洛李錕督禦陣亡府城於十一日失守又分股由新昌闌入臨江府城逆燄已逼南昌

曾侍郎飛調副將周鳳山統九江全軍往援鳳山取
道臨江十二月初三日遇賊於樟樹鎮鳳山謂其部
曰賊稱勁悍者惟藤牌手我軍鉤連槍足制之努力
前進毋退後遂選鉤連槍數隊先攻其藤牌隊賊果
敗斬驍銳五六百人蹋平西南賊壘五座其東北岸
一壘兼築礮臺以拒水師者鳳山約江西水師營官
劉于瀆會攻劉于瀆令軍功李廷棟首先登岸以火
彈焚其壘衆勇齊入搶其礮臺焚燬賊船殲賊一千
餘名新淦賊聞風他竄遂於初十日進復其城新淦

通撫州亦省垣要衝

楚軍分攻武昌漢陽水陸獲勝

十二月初一日官大臣親赴三眼橋督隊李孟羣率各營直撲漢陽西門立毀賊卡龜山尾月湖隄等大股悍賊抗拒奮勇擊殺數百名賊勢潰退逼入襄河死者極多水師礮船攻至五顯廟破水卡二座燬奪賊船二十餘隻漢陽東西門外賊壘一律蹋平其武昌之賊胡巡撫與羅澤南分紮李家橋洪山盡破賊壘晝夜環攻不令少息武漢各營兵勇皆有臨戰不

懷生之慨爲前所未有者

江南軍擊走安慶蕪湖諸賊

蕪湖下至揚州沿江汊河套港皆賊逋藪向大臣遣水師副將李德麟總兵吳全美節次捕勦去來無定是月偵無爲州城賊糾合安慶蕪湖羣醜東下圖解鎮江圍乃檄調水師沂江會攻敗賊於神塘河又裕溪口援賊由范羅山連亘陶陽浦同日亦爲官軍所殲生擒僞檢點趙元發僞將軍王化興等數十名楚軍擊敗援賊於梁子湖金牛鎮

武昌城外賊壘如林胡巡撫督飭羅澤南李道續賓
分路攻焚賊寨悉盡漢陽城外自龜山沿河而下賊
艇繚聚水師焚燬之上游入江之梁子湖下游之金
牛鎮羣賊赴援水陸各軍督紳民團勇數千人分勦
掃其巢穴擒獲匪黨數十名奪馬牛無算武漢外患
至此盡除